

Vanuatu Women's Centre



Ofisol Niusleta blong Vanuatu Women's Centre

WOKSHOP BLONG INTERPRETEM RISEJ MO INFOMESEN LONG VAELENS AGENSEM OL WOMAN MO OL PIKININI



Long namba 17 kasem 28 March 2025, Vanuatu Women's Centre (VWC) i mekem wan wokshop blong VWC Risej mo Interpretesen blong Infomesen, we Dr. Juliet Hunt mo Risej Ofisa – Sharon Frank tufala i lidim. Wokshop ia i bringim olgeta Team Supervisor blong VWC wetem ol staff we oli kat gudfala experiens blong kam tugeta blong lukluk gud long ol impoten findings blong Seken Nesonal Sevei long Laef blong ol Woman mo ol famili rilesensip, we oli mekem long yia 2024 wetem help blong Vanuatu Bureau of Statistics Ofis (VBoS).

Olgeta main tingting blong wokshop ia hem i blong:

- kivim save long ol staff mo ol branj ofis blong kasem gudfala understanding long ol findings blong risej, blong oli save toktok klia long hem long saed blong Vanuatu mo long intanasenal level.
- Kasem save blong putum ol infomesen long konteks blong ol ril laef experiens long Vanuatu.
- Lukluk gud long hao ol strateji wok blong stopem mo mekem response long Vaelens agensem ol woman mo ol pikinini, mo mekem ol rekomendesen blong kamap strong moa.

Ol staff blong VWC oli toktok long ol topik olsem vaelens we wan patna I mekem, vaelens we wan non patna I mekem, tingting blong pipol long saed blong vaelens agensem ol woman, ol samting we I save mekem se hemi moa isi blong wan woman or gel I kasem vaelens mo ol strategy blong daonem vaelens we I stap happen long ol woman mo ol gel, mo comparem wetem stadi we I bin tekem ples long 2011.

Ol resal blong wokshop ia bae VWC mo Statistiks Ofis bae I jas finalisem mop rilisim long ol manis we I stap kam, mo VWC, Gavman mo yumi evriwan i save yusum blong mekem ol strong-fala wok blong advokasi, sapot sevis, mo mekem ol polisi rekomendesen blong faet agensem Vaelens agensem ol Woman mo ol Pikinini long Vanuatu.



Vanuatu Women's Centre hemi wok wetem plante agencies blong mekem sua se ol woman mo ol gel oli gat akses lo sef mo gudfala sevis blong preventem mo stopem Vaelens long ol woman mo ol pikinini.

Vanuatu Women's Centre hemi luksave longtaem sapot blong Gavman blong Ostreilia blong stopem Vaelens Agensem ol Woman mo ol pikinini, mo sapot blong Gavman blong Niu Zilan.



NIUS EDITION

Greetings lo yu we istap ridim niusleta blong Vanuatu Women's Centre (VWC)!

VWC i stap wok strong blong helpem olgeta woman mo pikinini long Vanuatu, blong stopem faet mo Vaelens agensem ol woman mo pikinini. Mifala i stap lukaot gud blong mekem se evri woman mo pikinini oli save stap sef mo fri long ol nogud fasin blong vaelens.

Vanuatu Women's Centre ibin statem wok blong hem lo wan smol spes, be tedei senta i kam wan bigfala netwok we i kat ol counseling mo legal help, ol komuniti wokshop trening wetem ol defren krups, mo ol patna wetem ol Komiti blong Vaelens Agensem ol Woman (KAWAW) long ol provins. Mifala i stap wok kolosap wetem ol woman mo ol gel, blong kivim sapot sevis mo wan vois blong jenisim komuniti.

Long niusleta ya, bae yufala i ridim ol updeit long ol wok blong Senta, ol gudfala stori long field, ol event we bae i kam, mo yufala isave tekem aksen blong stopem ol nogud fasin blong Vaelens. Yumi save mekem jenj insaed long famili hom mo komuniti blong yumi. Yu, we yu wan man we istap fesem ol issue lo hom blong yu, kolem frilaen 161 blong mifala isave assistem yu. VWC istap wishim yu wan gudfala taem mo stap sef oltaem, Tugeta, yumi save mekem bigfala difrens.

“Kastom blong yumi i stap olsem wan ekskuse blong sam man blong mekem vaelens. Be tru kastom blong yumi hem i minim respekt — respekt lo narafala pesen, long mama, sista, mo gel blong yumi.”
— Merilyn Tahi, founder blong Vanuatu Women's Centre

TAFEA COUNSELLING CENTRE



Tafea Counselling Centre i bin ko aot long komuniti blong Agriculture eria, Isangel lo West Tanna blong mekem Mobile Counselling. Hemi wan impoten aktiviti we kivim janis long ol man mo woman long komuniti blong kasem sapot sevis mo toktok wetem ol counsellor long saed blong ol problem olsem domestik vaelens, famili issue, hao blong kasem ol sevis blong VWC. long taem ia oli seremaot Calendar, brochures, niusleta mo posters. TCC hemi tekem ol sevis i kam klosap long ol pipol long rural komuniti we oli no save kasem sevis long taem ia.

KOMBINE AWARENESS



Long namba 25 Maj 2025, Vanuatu Women's Centre (VWC) ibin stap lo wan komuniti blong Smet long Port Vila. VWC ibin part long awareness ia wetem Police Crime Prevention Unit, mo Dipatmen blong Labour

Main tingting blong aweanes ia hem i blong helpem komuniti blong kasem infomesen long sam impoten program mo isu olsem:

- **RSE mo SWP Prokram long Oversea:** Oli explenem gud wanem ol prokram ia oli minim, mo wanem oli save fesem taem i ka-maot sapos wan man o woman i ko long kaen prokram ia be i no folem ol rul o i aot long prokram ia.
 - **Domestik Vaelens:** Vanuatu Women's Centre ibin tokbaot vaelens insaed long wan hom, mo i kivim save lo taem vaelens istap laef lo wan famili hom, olsem wanem blong protektem yu wan, mo wanem help we yu save kasem.
 - **Family Protection Law:** Awareness ia i tokbaot loa we i protektem ol woman, man, mo pikinini long famili, mo wanem ol raet blong olgeta i stap anda long loa ia.
 - **Cybercrime Offence:** Police mo ol patna oli kivim infomesen long ol rabis samting we i stap happen long online, olsem ol tok nogud, threatening o sharing blong ol private foto blong narafala, mo wanem bae i save hapen long man o woman we i brekem loa ia.
 - **Blong Reportem Wan Incident:** Awareness ia i kivim tu stret rod long komuniti long wanem blong mekem sapos oli witnessim wan kriminol samting olsem domestik violence o cybercrime. Oli bin tokbaot hao blong reportem long stret ples mo long stret fasin.
- Kombine awareness ia i wan bigfala step blong wok tugeta wetem komuniti blong mekem se evri man mo woman i save gud ol loa mo prokram we i stap mo olsem wanem blong protektem olgeta wanwan mo famili blong olgeta.

JENDA BASE VAELENS WOKSHOP



Vanuatu Women's Centre ibin patispet lo wan impoten wokshop blong agri long Gender-Based Violence (GBV) Multi-Sector Service Delivery Protocol (MSDP) i tekem ples long namba 2 Eprel long Port Vila. Abaot 40 man mo woman blong ol difren ofis oli kam tugeta blong mekem strongfala komitmen blong Vanuatu blong faet agensem Gender Base Violence.

Department blong Women's Affairs mo UN Women tufala imekem wokshop ia, thru long Pacific Partnership program. aim blong wokshop ia hemi blong mekem sua se MSDP hemi klia mo i save helpim ol pipol we oli stap wok long saed blong disklosa, respons, referral, infomesen sharing, mo hao blong faet agensem GBV long taem blong emejensi.

Wokshop i finis wetem wan plan blong go hed wetem ol neksfala step, we hemi includem karem ol lasfala fidbak mo submitim long Cabinet blong ol Minista blong mekem ofisiol.



Penama Counselling Centre ibin mekem Awareness toktok lo 4 vilij lo East Ambae lo

- Amata Vilij
- Apopo Vilij
- Lolobanga Vilij (South West Ambae)
- Halalulu Vilij

lo taem blong awareness ikat ol man, ol woman mo ol pikinini oli stap lo taem ia tu. PECC I distributem ol poster, brochures lo VWC Sevis, Famili Proteksen Loa, Calendar 2025 mo Niusleta.

KAVAW RESET UP LO CENTRAL PENTECOST-2



Lo namba 7 kasem 11 Eprel 2025, VWC i bin mekem 5-dei Jenda base vaelense workshop wetem 25-woman lida mo 4 jif we i bin joenem ol woman long komuniti blong Guon long central pentecost. Workshop ia i help blong re-setemap KAVAW long Central Pentecost-2 long Melbrin, mo tu i setemap fesfala KAVAW long East Pentecost. Hemi wan gud nius blong VWC mo network blong hem. Ol pipol mo ol jif long East mo central Pentecost oli soem bigfala interest long wok we senta istap mekem blong daonem ol rabis fasin blong vaelense long ol women, yangfala gel mo ol pikinini boe long komuniti blong olgeta-Community Educator italem.



Wanem ia Vaelens?


Hemi fasin we igohet ensaed long ol rilesensip, taem wan iusum ol fasin blong pawa blong kontrolem narawan.

Be ol fasin blong yu ya isave mekem ol aksen we akensem loa. Yu save ko long kalabus sapos yu mekem ol aksen blong vaelens.

YUMI MAS STOPEM FASIN BLONG DOMESTIK VAELENS!

Hemi nomol blong film kros sam taem - be vaelens hemi NEVA wan gudfala fasin blong yusum long wan taem olsem.

Domestik vaelens hemi fasin blong stap faetem nogud mo mekem narawan iharem nogud long bodi blong hem mo long tingting blong hem.



Naoia, wan strong partnership i stap bitwin Vanuatu Women’s Centre mo Vanuatu Bureau of Statistics blong tekem aksen long #SDG5. Namba tu National Survey long vaelens agensem ol woman bambae i kivim impoten data long bigfala issue ia – mo hemi festaem bakeken long ova long 10 yia.

Stretfala data i save lidim yumi i ko long prokres, mo prokres i save mekem tru lo jenj ia!

Taem we yu harem se kros i stap kam antap, yu mas talem long yu wan **STOP!**

Leko situesen ia smol taem, ko pulum win, wok baot mo kam bak blong storian wetem man o woman ia we yu yu kros long hem - taem kros blong yu i ko daon.

Sapos yu wan woman we yu stap fesem domestik vaelens yu save faenem help long: Vanuatu Woman’s Centre:

Fon namba hemi 24000 o Fri Laen 161

Vanuatu Police Force: Fri Laen 111

Toktok wetem Wan Komuniti Lida o Jioj Lida o Jif blong Komuniti.

